



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8

Bendanger tashi ajanga Assam- Mizoram tensa raksatsür: Kiren Rijiju

Ita 6 tsüngda Afghanistan nung tensa melenshitsu: Ashraf Ghani



VOL. XVIII NO. 290 (ADOK 290) DIMAPUR

SANGTENNÜ (TUESDAY)

LUROI (AUGUST) 03, 2021

₹ 5.00

COVID-19 Nagaland: Nisung 28,000 adenogo

Kohima, August 2, 2021 (TYO): Hombarnü Nagaland nung nisung 59 dak COVID-19 putetba ajanga nisung 28,000 adenogo.

"Tanü nisung 59 dak COVID-19 putet. Parnokji Mokochung nung 18, Kohima o Dimapur nung terpezüü (14), Peren nung 3, Longleng, Mon, Tuensang o Zunheboto nung anana (2) aser Kiphire o Wokha nung kaka (1) lir. Parnok züngsema nisung ajak agi 28,004 kümogo" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Hombarnü COVID-19 puteta alir nisung 94 taneptsü angu. Parnokji Kohima nung 30, Peren nung 21, Mokochung nung 12, Dimapur nung 10, Wokha nung 9, Mon nung 4 aser Wokha nung 3 lir. Parnok züngsema taneptsü angur ajak agi 25,338 kümogo" ta paisa ashi.

"Nagaland nung COVID-19 nungi taneptsü angur 90.47% lir aser tang nisung 1,300 anepaludar" ta Dr Kikon-isa ashi.

Hombarnü COVID-19 puteta alir nisung 4 asü. Dimapur aser Kohima nung nisung anana asü

asert parnok züngsema nisung 574 süogo saka nisung 14 bo tanga tashidak ajanga asü, ta paisa metetdaksü.

"Tang tashi nung COVID-19 alitsü akok ta temolung melemi bilemba sample 266,001 tendangogo. RT-PCR ajanga 103,054, TrueNat ajanga 68,201 aser Rapid Antigen Test ajanga 94,746 tendang" ta Dr Kikon-isa ashi.

"Deobar tashi nung nisung 618,726 nem COVID-19 vaccine indang dose 770,168 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 61,085, healthcare workers 15,967, arishi küm 45 ser temapur 185,456 aser arishi küm 18 nungi 44 tsüngda alir 356,218 lir" ta paisa shisem.

"Vaccine agirtem rongnungi nisung 151,442-i dose anaprong agiogo. Parnokji frontline workers 39,602, healthcare workers 12,440, arishi küm 45 ser temapur 98,779 aser arishi küm 18 nungi 44 tsüngda alir 621 lir" ta Dr Thurr-isa metetdaksü. Nagaland Unlock-4 tenzükogo aser iba ya August 18 tashi atema lir.

Assam sorkari SOPs tasen sangdongogo

Guwahati, August 2, 2021 (Agencies): Hombarnü Assam sorkari COVID-19 atema Standard Operating Procedures (SOPs) tasen metetdaksüogo.

Sorkari tanü sangdong agütsüba nung "round the clock curfew" malitsü ta shia lir.

Ajisüaka, district 2- Golaghat aser Lakhimpur nung positivity rate tera ajema akümba ajanga nikongdang 2:00 ako nungi anepdang 5:00 ako tashi curfew alitsü. Tanüngba district tem nung nikongdang 5:00 ako nungi anepdang 5:00 ako tashi curfew alitsü.

Golaghat aser Lakhimpur district tem nung dokantem nikongdang 1:00 ako tashi tanüngba district tem nung nikongdang 4:00 ako tashi

lapoktsü melar ta sorkarisa ashi. Public transport ketdangsürtem ajaki garitem nung COVID-19 inyakyim beshitsüba aser kiyimba mesüra asüpila sentongtem nung nisung 10 tashi adenshitsu melar.

Public tesem ajak nung face mask enoktsüba aser district ajak nung excise ketdangsürtemi ozüng alema yangluba yi yangluba aser ayokba noktangtsüba, ta Assam sorkarisa metetdaksü.

August 7, 2021 sülen ang inter-district passenger transport services, district tem tsüngda nisungtem senzusenbongtsü aser offline classes tenzüktsü asoshi telemtetba agitsü ta sorkarisa ashi.

Longkhum yimdak tambur ka rungset

Mokokchung, Aug 2 (TYO): Aug 2 nü ankongbang 2:00 ako meta Longkhum yimdak ki arung aser iba kitsük-kirung lendong nung tambur ka rungset, ta osang ajanga angazüker.

Iba osang angashia iba osangbeneri Longkhum putu yimsüsür ka den jembidang, iba mi ji ankongbang 2:00 ako meta liasü aser mi ji light nungi adokba asütsü ta bilemer, ta ashi. Tasüsangji tambur küm 80 shi

asütsü aser paji mekokmeiner ka liasü, ta paisa ashi.

Mi lendong atalokba mapang kidang tambusang kisüng liasü. Pa temeim kinungtsüa temang manem kinunger kar kidang Alichen nung munga liasü. Tambusang'ar kiji jara ki saka kilembo injung agi tonger liasü. Yimertemi lendong atalokbaji meteta arudangbo menuatoker liasü, ta osang ajangasa angazüker.



Hombarnü Capital Convention Centre, Kohima nung All Nagaland College Students' Union (ANCSU) indang 42 buba Foundation Day aser Degree Toppers nem tenüngsang agütsüba sentong agidang tangokba noksa angur. Iba sentong nung Nagaland University, Kohima Science College (Autonomous) aser Patkai Christian College (Autonomous) nungi degree toppers 57 nem tenüngsang agütsü aser Nagaland University Vice Chancellor Prof. Pardeshi Lal-i o jembi. (Kohima, August 2)

Naga yimten teloktem telemtetba ka aser tenangzüktep ka atema longjemdaksüla

Kohima, August 2, 2021 (TYO): Centre dang tekaratiba nung Naga yimten latettsü rongshitsu atema olemteper ajaki telemtetba ka aser tenangzüktep ka atema külemi longjemtsüla, ta Parliamentary Committee on Naga Political Issue (PCNPI)-i tanü metetdaksü.

Hombarnü State Banquet Hall nung Parliamentary Committee on NPI senden amendang iba onük jembi, ta Member Secretary aser Planning & Coordination, Land Revenue and Parliamentary Affairs Minister, Neiba Kronu-i ashi.

Ghonda asem jungnüa senden amendang Chief Minister, Deputy CM, Opposition Leader, Rajya Sabha MP K G Kenye, BJP aser Independent MLA temi iba atema pei pei tebilembatem lemsatepa liasü, ta Kronu-isa ashi.

Mapang meputepba den ano COVID-19 wara ajanga Core Committee-i July 20 aser 21 anogotem Dimapur nung Naga

yimten teloktem den senden balala menogo, ta paisa metetdaksü.

Core Committee indang July 9 bangzüng tanü senden nungsa benoka jembi aser idangji NLA indang monsoon session tenzükba anogo nung iba onük jembi ang bangzüngteptsü lemtet, ta paisa ashi.

Mapang aoer aser tekaratiba nung Naga yimten tebilemstü ateam langka ka metongtetra sangkümba kanga ariteptsü, ta paisa ashi.

Core Committee-i iba tebilemstü ya Naga civil society teloktem dena jembitsu asü koma ta osangbenertemi asüngdangdang "onoki senden jaoka mamen saka Naga civil society temia olemteper ajak longjemtsü asoshi kasa tebilemba lir" ta Minister Kronu-i langzü.

"India sorkar den olemteper Naga telok ana külemi ajurutepa senden amenba sülen ang Core

Committee-i Centre sorkar den iba onük lemsateptsü. Nagaland MLA temi Central lennirtem den ajurutepa jembiogo aser parnoki Naga teloktem longjemdaksütsü atema dang telangzüba agütsüogo" ta paisa ashi.

Chief Minister Neiphu Rio aser Opposition Leader TR Zeliang nati yaküm December 18 nü külem sangdong ka agütsü aser NLA budget session nunga telemtetba ka agiogo, ta Kronu-isa shisem.

NSCN(IM)-i taonung ayaterm nungi tenzükter ghonda 12 mokdangtsü ayongba atema state sorkari kecha jembi mejembi ta osangbenertemisa asüngdangdang "asüng Assembly nung Naga yimten tebilemstü indang jembidang MLA temi pei pei tebilemba lemsateptsü" ta Minister Kronu-i langzü.

Parliament session aliba ajanga tanü senden nung Lok Sabha MP Tokheho Yephthomi medentet, ta paisa shisem.

NLA-i Assam den arrtsü atema telemtetba ka agitsüla: RPP

Dimapur, August 2, 2021 (TYO): Nagaland Assembly indang Monsoon Session nung India sorkar dang State of Nagaland Act 1962 yanglushitsu atema bangzüng ka renemtsüla ta Rising People's Party (RPP)-i takhangba agütsüogo.

16 Point Agreement nung Point 12 nung aliba ama Nagaland arrtsü tejangja ladangtsü atema iba Act yanglushitsu nungdaker, ta RPP-i ashi.

Nagaland Home Minister aser state sorkari Assam den tawa MoU nung sign asüba ajanga Tsurangkong sector nung tensa süngjemdaksüba atema pelar

saka iba ya mapang tatsüka atema dang lir, ta parnokisa ashi.

1988 küm Assam-i Supreme Court nung Civil Suit 2 benoka aliba meyipa agiba aser India, Assam o Nagaland sorkartem tsüngda yimtenren olemteper agiba ajanga dang teti atema yimjung bener arutsü. Iba onük atema Assam-i kanga tekong meranga noktaker anungji Naga nungeri indangdanga India sorkar den jembitsu, ta RPP-isa metetdaksü.

13 buba Nagaland Legislative Assembly nung MLA 60 pronglai State of Nagaland Act 1962 yanglushitsu atema bangzüng

renema India sorkar dang mepishitsu, kechiyong Indian Parliament-i Constitution nung Arlla 3 aser 4 nung ajemdaker state ka indang arrtsü ladangshitsu koka lir, ta RPP-isa ashi.

UNTABA-i iba atema shiogo saka tanü tashi Nagaland sorkari mapa meinyaker. Nagaland MLA temi iba ama bangzüng ka renem nungbo Naga nunger ajaki pusema nungittsü, ta parnokisa metetdaksü.

Assam-i Mizoram nunger anema rongsenketzüng mokdang ayongba khukhua aitsür, ta RPP-isa ashi.

Dmr & Kma nung 'Odd-Even Traffic' inyakyim magiener

Dimapur, August 2 (TYO): Dimapur aser Kohima district ketdangsürtemi August 18, 2021 tashi garitem odd-even inyakyim nung senzütsü metetdaksüogo.

Nagaland nung August 1 nungi 18, 2021 tashi Unlock 4 tenzükba osang metetdaksüba sülen Kohima aser Dimapur nung odd-even inyakyim maneni beshitsu metetdaksü.

Deobar dak alaka August 18,

2021 tashi Kohima Municipal tesem nung nija-garitem 'Odd-Even' inyakyim nung senzütsü, ta Kohima Deputy Commissioner, Gregory Thejawelie, NCS-i sangdong ka nung ashi.

Külen, Commissioner of Police, Dimapur Rothihu Teseo, IPS-ia Dimapur district nung August 18, 2021 tashi gari ajak 'Odd-Even' inyakyim nung senzütsü ta metetdaksü.

Hombar, Bodbar aser Hokolbar anogotem züngdanga 1,3,5,7,9 agi tembangba garitem senzütsü.

Mongulbar, Brihostibar aser Honibar anogotem züngdanga 2,4,6,8,0 agi tembangba garitem dang senzütsü.

Iba tetuyuba alema inyakterem Motor Vehicle Act 1988 nung Arlla 177 & 179 kübok temerenshi alitsü, ta ketdangsürtemisa metetdaksüogo.

Independence Day atema Kohima district level senden amen



Dimapur, Luroi/August 02 (TYO): New Secretariat Plaza, Kohima nung August 15, 2021 nü Independence Day amungtsü aliba dak sendakba nung mapa alemtsü aser achayangtsü asoshi jembishinütsü atema district nung department balala nungi ketdangsürtem den senden ka Deputy Commissioner indang Conference Hall, Kohima nung August 2, 2021 nü Deputy Commissioner Kohima, Gregory Thejawelie NCS ayongzüka

mena liasü. Mapalem atema State level senden nung lemtetba tanaben lepa reprangshi aser district level nung anepalutsü asoshi mapa nunglokja aliba jembia department balalai parnok nem nungloktsüba mapa tem jangjatepa liasü. Iba sentong kübok mapang balala lemsaba nung cultural troupes aser football exhibition match aser danga sentong nung shilem agitsüpur anepaluba

indang department shia senden nung jangjatepa liasü. Deputy Commissioner-ia district ketdangsür ajak dang sorkar tenzüker ama iba sentong süoki ia agitsü asr Independence Day tajungtiba nung mungtettsüsa pei mapa shidak inyaksü ayongzüka liasü. Taküm teyari agütsütsü atema Institutions/Homes semdangba sentong malitsü, ta paisa metetdaksü.

Kohima Unlock Phase-IV atema tetuyuba agütsüogo

Dimapur, Luroi/August 02 (TYO): Kohima District nung August 2, 2021 nungi August 18, 2021 tashi Unlock Phase-IV alitsü aser iba mapang talenba kar salatsü asoshi Deputy Commissioner Kohima, Gregory Thejawelie, NCS ajanga osang ka sangdonga liasü.

- i. Mela aliba anogotem nung dokan tabu ajunga lapoktsü atema mapang ya anepdang 6:00 ako nungi nikongdang 6:00 ako tashi alitsü.
- ii. Night Curfew mapang ajemtsüogo aser ibai aonung 8:00 ako nungi anepdang 4:00 ako tashi alitsü.
- iii. Takeaways/ home delivery outlets tem curfew mapang (aonung 8:00 ako nungi anepdang 4:00 ako) dak alaka anogo ajak nung lapoktsü melatsü.
- iv. Home Department ajanga Detailed SOP nung meja-meja shia aliba ama Kohima district nung bus tem menden shilem 50 nung mener jajatsü melatsü aser iba atema driver aser teyariteper (Handyman) tenaprong COVID-19 anema mozü ajunga agir alitsüla, mesüra COVID-19 anema mozü dose mezüngbuba agir

- v. anogo 15 bo junger asütsüla; aser shia aliba anaprong ya meinyak lira, driver/ attendant (Handyman) temi RT-PCR/TrueNat mesüra CBNAAT ajanga tendangba COVID-19 negative test report bener senzütsüla, koba anogo 15 dang tema masütsüla.
- vi. Home Department ajanga Detailed SOP nung shia aliba anogo nungi tenzüka Kohima nung Inter-District bus service/taxi service senzütsü melatsü, saka tekalen shia aliba ama inyaksüla aser iba den bendenloksema passenger ya COVID-19 mozü ajak tembanga agir alitsüla, mesüra dose mezüngbuba agir anogo 15 junger alitsüla. Shia aliba anaprong ya meinyak lira, passenger temi RT-PCR/TrueNat mesüra CBNAAT ajanga tendangba COVID-19 negative test report bener senzütsüla, koba ghonda 72 dang tejenba masütsüla.
- vii. Para 'iv' aser 'v' atema Detailed SOP den anogo inoksema kodang nungi amshiyonga aotsü, ibaji Home Department ajanga agütsüba Detailed SOP

- viii. nung mela aliba ama metetdaksütsü.
- viii. Kohima Municipal area kübok Local Taxi tem nung passenger ana (2) mener jajatsü melar aser tejaklen passenger kata mamentsüla aser Advisory No. GAB-I.COM/GEN-I/2020 (Pt-V) Dated 12.06.2021 nung shia aliba ama plastic barrier/sheet inoktsüla. Ajisüaka Local Taxi temi RTA ajanga Order Dated 06.10.2020 nung latetja aliba dang nungi para tali meshitsü memelar. Local Taxi Driver tem mozü agiba indang tejangja Taxi indang windshield nung teti atema inoka ayutsüla.
- viii. Application ajak warroomkohima@gmail.com dangi yoktsüla. Teyari atema Helpline Nos. 6033833879/9362705742 nung tongteprateptsü akok.
- ix. Tanüngba inyaksangshi kobasa mela mali, itemji maneni nokdangtsü. Tekalen shia aliba totuyubatem nung mapettsüsa inyaksangshi kar danga lira, itemji Indian Penal Code indang Section 188 kübok aser Disaster Management Act, 2005 indang temzüng kübok merenshitsü.



HSLC examination 2021 nung takok anguba kaketshir nem tenüngsang aser tetushi agütsüba sentong ka Superintendent of Police, Wokha, Imtitoshi Ao aser Regimental School, DEF, Wokha ajanga SP indang Office chamber nung August 2, 2021 nü ayongzüka liasü. Iba sentong nung distinction anguba kaketshirtem men kulikaket den senotsü teyari agütsü aser distinction anguba subject teacher nema senpet agüja liasü. Regimental School, DEF, Wokha nungi kaketshir 16-i taküm HSLC tatidang agütsü aser parnok ajaki takok ngua liasü

Govt. School tanurtemi Logo Design tetoktepba nung shilem agi

Dimapur, Luroi/August 02 (TYO): Logo Design Competition nung mezüngbuba jenjang ngutetba atema Government Middle School Aradhura, Kohima nung Class 6 nung azünger Julley Daimary nem Principal Director, School Education aser Project Director, Nagaland Education Project-The Lighthouse (NECTAR), Shanavas. C, IAS ajanga smartphone ka den kulikaket agüja liasü.

agütsütsü. Logo yangluba tetoktepba ya state nung Government School ajak atema Department of School Education kübok Nagaland Education Project-The Lighthouse (NECTAR) ajanga ayongzüka liasü. Nagaland Education Project-The Lighthouse (NECTAR) yagi Nagaland nung shisaliok ajunga tajungba kuma melenshitsütsü aser education system melenshitsütsü nükjidong nung maparen balala inyaker. Iba tetoktepba sentong nung Government School balala nungi kaketshir 236-i shilem agia liasü, aser parnok ajak nem aser pei azüngba school tem nem computer printer kaka agütsütsü.

Ajidang masü School nem All-in-one printer ka agütsü. District 12 prong nungi takok angur ajunga nem smartphone kaka den kulikaket agütsütsü aser pei azüngba school tem nem computer printer kaka agütsütsü.

Iba tetoktepba sentong nung Government School balala nungi kaketshir 236-i shilem agia liasü, aser parnok ajak nem aser pei azüngba school tem nem computer printer kaka agütsütsü.

Planning & Coordination Dept. nung Addl. Development Commissioner den tepila sentong agi



Dimapur, Luroi/August 02 (TYO): Department of Planning and Co-ordination ajanga Additional Development Commissioner menden nungi anisüngzüksang, Nosazol Charles nem akum agüja tepila sentong ka July 31, 2021 nü Conference Hall, Nagaland Civil Secretariat, Kohima nung ayongzüka agia liasü.

Minister, Planning and Co-ordination, Neiba Kronu, Administrative Heads aser state department balala nung tekolakpuri pa den amalitepba aser yaritepba asoshi pelaba lemsatepa liasü. Department staff temi meranga inuakba ajanga pa wadang nung takok nguteta liasü, ta pai ashi.

Iba sentong nung tejembir balalai mapa nungi anisüngzüksan leniri takok nung wadang tembanga atema tenüngsang agütsür aser Nagaland sorkar tenzüka asoshia pelaba lemsatepa liasü. Departmental Service Rule indang takok ngua benokba aser Sustainable Development Goals Coordination Centre (SDGCC) amenokba nung pai shilem tajung agiba indang department ajanga lemsatepa liasü.

Iba sentong nung Joint Development Commissioner, Augustine M Yanthan menden liasü, shibai tepela ankep o jembi. Iba sentong nung Minister, Planning & Co-ordination, Land Revenue & Parl. Affairs, Neiba Kronu aser Planning & Co-ordination Department nungi ketdangsürtem aser staff tem dena liasü. Joint Development Commissioner, Akyuba Sangtam ya Head the Department tasenba alitsü.

Sentong nung Nosazol Charles-i jembiba mapang,

Tening town nung COVID-19 awareness sentong agi

Dimapur, Luroi/August 02 (TYO): Tening Sub-Divisional Task Force on COVID-19 kübok CHC Tening ajanga August 2, 2021 nü dokan kibur, driver aser danga stakeholder tem asoshi awareness sentong ka GHS Auditorium Hall, Tening nung agia liasü.

tendangtsüla, ta pai ashi. Parnok yagi teti COVID-19 tashidak nungi jenbua alitsü yimyatam amshitsüla aser aji nüngdak ta ajiteta driver, dokan kibur aser danga stakeholder tem atema iba sentong ya ayongzüka, ta ashi.

Sentong nung ADC aser Chairman SDTF Tening, Rhosiotho Nguori-i jembiba mapang sentong nung dena alirtem nem tenüngsang agütsü aser driver aser dokan kiburtem ya COVID-19 tashidak temelaba menatsüpur lir, ta ashi.

MO, CHC Tening, Dr. Menangtongzuk-ia COVID-19 dak sendakba nung mozü agitsü atsü-ayongba aser COVID tendangtsü amala indang onük nung jembia liasü. Iba sentong nung Aduile, ANM menden liasü aser Executive Secretary LBA (N) aser SDTF on COVID-19 züngsem, Rev. Kitanwi-ia jembia liasü.

Anungji item nisungtem ya mozü agitsü nüngdaker aser mapang shia COVID tashidak

Aaranyak-i forest staff nem sempet agütsü



Guwahati, August 2, 2021 (Agencies): Northeast indang biodiversity conservation lokti tongtipang Aaranyak-i Kaziranga National Park aser Tiger Reserve tsütsü aliba Karbi Anglong district nung frontline forest staff nem wadang nung amshitsü atema osettsüsettem tenla agütsüogo.

Deobarnü CRMH School aser Karbi Anglong Forest Department indang Dolamara Range den longjemer Aaranyak-i sentong ka ayongzüka agi. Iba sentong nung Aaranyak-i Karbi Anglong forest department indang frontline forest staff 31 nem torch light aser tsüngsem lema agütsü.

Item osettsüset alitsü atema Kirloskar Ebara Pump Limited (KEPL) ajanga senotsü teyari agütsü. Aaranyak indang Tiger Research and Conservation Division, Head, Dr. M. Firoz Ahmed-i tejaokertem pelashishia agizük aser sentong agiba indang telok dang metetdakja liasü.

"Nübu ishika dang süaka tawa tanü tzunglu tali aruba

ajanga tzümettsüng agi kongshiba arem aser shirurutem kümzüksü asoshi Karbi Anglong forest department indang staff tem ajungshia inyakdaksütsü" ta Dolamara range, Karbi Anglong in-charge, Prahalad Kro, ACF-i ashi.

Maparen den apet nüngdakba osettsüset agüja nungitba atema Prahalad-isa Aaranyak dang pelaba metetdaksü.

"Kaziranga aser Karbi Anglong forest kümzüka ayutsü atema Karbi Anglong tesemtem ya kanga tongtipang aser ajak longjemer inyaktsü nüngdaker" ta Aaranyak indang chief executive officer, Dr. Bibhab Kumar Talukdar-ia ashi.

Lipüküm kümzüka aser wazüka ayuba wadang takok ngua bener aotsü asoshi Aaranyak-i Kaziranga National Park aser Karbi Anglong Forest Department indang Forest kettangsurtem den maneni amalitepa inyaktsü, ta Talukdar-isa metetdaksü.

Karbi Anglong forest staff nem teyari agütsüba atema

Kaziranga Tiger Reserve indang field director, P Sivakumar-i Aaranyak dang pelaba lemsatop aser shirurutem kümzüka ayutsü asoshi Kaziranga Tiger Reserve tekolakpurtemi Dolamara range nungita yariba indang paisa metetdaksü.

"Iba range nung arem shiruru kümzüka ayuba dang masü, saka shiruru amungba tesem samaba aoba nungi kümzüksü atema, jenjang aketba süngdongtem ashi-auer keti maotsüsa mitsüla. Anungji, item maparen ajak asoshi forest staff temi tongti shilem agitsüla, ta metetdakja liasü" ta paisa ayongzüok.

Iba sentong nung Kaziranga national Park telongtet nung Eastern Assam Wildlife Division indang divisional forest officer Ramesh Gogoi aser Kohora range indang range officer, Bibhuti Ranjan Gogoi na aden.

Forest staff den Aaranyak indang Arif Hussain, Sarlongjon Teron, Sourav Gupta, Ajay Angu aser Rowel Engti nungeri iba sentong achaayanga agi.

Bendanger tashi ajanga Assam-Mizoram tensa raksatsür: Kiren Rijiju

Guwahati, August 2, 2021 (Agencies): Assam aser Mizoram tsüingda tensa mejungi akümba ya bendanglen nungi tashi kar ajanga adokdaksüba lir ta Union law minister Kiren Rijiju-i ashi.

Asen linük adena orr alirtemi o tamajung shia ozüing alema inyaktsü ajungmesor ta Hombarnü Rijiju-i shi.

Prime Minister Narendra Modi-i BJP MP tem dang pai Northeast meimer aser politics tsütsü nungi dang merangloksü ashi, ta Arunachal Pradesh MP Rijiju-isa metetdaksü.

Northeast state ajak nungi BJP MP temi PM den ajurutepa

tebilemtsü onük balala jembioigo aser iba nung Assam-Mizoram arrtsü indang dena lir, ta paisa ashi.

Congress ama political party temi Assam-Mizoram arrtsü tebilemtsü nung politics dendaktsür jembir ta Northeast MP temi PM Modi nem memorandum ka agütsüba nung shia lir.

"Northeast nungi BJP MP temi PM dang pelaba metetdaksüogo aser Congress den tanga party temi arrtsü ken o nung politics idaktsüba indang ashi. Onoki Congress dang iba ama onük nung politics medendaktsütsü mepishir" ta Rijiju-isa metetdaksü.

Mizoram nung nisung 438 dak Covid-19 putet

Aizawl, August 2, 2021 (Agencies): Tesüiba ghonda 24 tsüingda Mizoram nung nisung 438 dak Covid-19 putetogo.

Hombarnü State nung Covid-19 positivity rate 36.56% kümogo. Ajisüaka, tesüiba ghonda 24 nung iba wara ajanga nisung ka danga asüba osang mali.

Hombarnü, Department of information & public relations, Mizoram-i ashiba agi, tashidak tasen puteter rongnung nisung 13 shi TrueNAT test ajanga putet. Ano külen, Rapid Antigen Test (RAT) ajanga nisung 425 dak Covid-19 putet.

Ajisüaka, Deobarnü Zoram Medical College (ZMC) Hospital indang lab shibang asünung RT-PCR laboratory

nung test kecha magi.

Tashidak tasen puteter densema Mizoram nung nisung 39,363 dak Covid19 putetogo.

Kasa mapang, Covid-19 agi shiranga alir shirnok dak taoba nung Covid-19 putet, parnok rongnung nisung 372 shi taneptsü nguogo. Taneptsü angur rongnung, Aizawl nungi nisung 261, Mamit nungi nisung 46, Kolasib nungi nisung 40, Lawngtlai nungi 14, Siaha nungi 9 aser Champhai district nungi nisung 2 dena lir. Mizoram nung taneptsü angur shilem 68.75% asütsü.

State nung Covid19 puteter rongnung tebur 20,764 aser tetsür 18,599 lir. Tang, state nung nisung 12,189 shi iba tashidak agi shirangdar. Iba tesashi wara ajanga nisung 150 taküm samaogo.

Mizoram Governor-i PM Modi & Amit Shah den ajurutep


Aizawl, August 2, 2021 (Agencies): Assam aser Mizoram arrtsü mangatettep adokba sülen Mizoram Governor K Hari Babu-i Hombarnü Prime Minister Narendra Modi aser Union Home Minister Amit Shah na den ajurutepogo.

Centre-i angatetteptsü lenmang bushidar, ta Governor

K Hari Babu-i ashi.

"Home minister-i tensa süngjemdaktsütsü aser angatetteptsü atema lenmang bushidar. Assam Chief Minister Himanta Biswa Sarma aser Mizoram Chief Minister Zoramthanga naprongi yimjung bener arutsü nangzükogo" ta paisa metetdaksü.

Zoramthanga-i Assam CM aser kettangsurtem anema FIR benokba meyipa agitsü tuyu



Zoramthanga

Assam-Mizoram arrtsü tebilemtsü angatetteptsü atema Vairengte, Kolasib District nung FIR benokba meyipa agitsüla, ta Zoramthanga-i ashi.

Deobarnü Mizoram Chief Secretary Lalnunmawia Chuango-ia Sarma anema FIR benoka aliba meyipa agitsü kechiyong pai aibelena inyakba kuli kecha mali ta metetdaksüogo.

Deobar aonung Assam CM Sarma-ia Mizoram Rajya Sabha MP K. Vanlalvena anema FIR benokba meyipa agitsü tetuyuba agüja liasü.

Union Home Minister Amit Shah aser Mizoram chief minister Zoramthanga na den jembiba sülen Sarma-i iba osang metetdaksü.

Aizawl, August 2, 2021 (Agencies): Mizoram chief minister Zoramthanga-i state police dang Assam CM Himanta Biswa Sarma aser Assam sorkar kettangsur 6 anema FIR benoka aliba meyipa agitsü tetuyuba agütsüogo.

**GOVERNMENT OF NAGALAND
DIRETORATE OF TECHNICAL EDUCATION
NAGALAND: KOHIMA
NOTIFICATION**

NO. DTE/ ESTT-2/7/2019-20/ Applications are invited from the interested candidate to apply for the courses given in the tabulation below along with CI-X Admit Card, CI-XII Admit card and Mark sheet, ST & Indigenous certificate. Application may be submitted to the office of the under-signed during office working hours with a processing fee of Rs. 200/- (two hundred) only on or before 6th August, 2021.

Sl. No.	Branch	No. of seats	Eligibility	College/ Institute
1	Civil Engineering	01	Passed 10+2 with PCM/PCM 40% marks for ST candidates	Tripura Institute of Technology, Narsingarh, Tripura
2	Mechanical Engineering	01	-do-	-do-
3	Computer Science & Engineering	01	-do-	-do-
4	Electronics & Communication Engineering	01	-do-	-do-

The admission of students into 1st year Degree Engineering course will be subject to payment of normal tuition fee per semester. THE INSTITUTE DOES NOT PROVIDE HOSTEL FACILITY.

(Nungsangmenalmchen)
Ex-Officio Director

Issued by DIPR

**GOVERNMENT OF NAGALAND
DIRECTORATE OF HEALTH & FAMILY WELFARE
NAGALAND: KOHIMA**

No. DHFW-523/TRG-NSG/2017/4442 /Dated, Kohima, the 2nd Aug. 2021.

ADVERTISEMENT

In continuation to this Office Advertisement No. DHFW-523/TRG-NSG/2017/7519-24, dated, the 22nd June 2021 which was published in the local dailies on 25th June 2021. It is hereby notified that, only for those candidates who have recently cleared the HSSLC exam during the academic session 2021 are invited to fill up the online application form to undergo training in General Nursing & Midwifery (GNM) and Female Health Worker (FHW) for the session 2021-2022.

Further details are indicated below:

- Online form submission is from 4th - 7th August, 2021 (only for those candidates who have recently passed out the HSSLC exam during the academic session 2021).
- The Application Form can be downloaded from the Department Website: nagahealth.nagaland.gov.in
- Duly filled in application in PDF format along with requisite supporting documents should be submitted through email to: dhfw.training@gmail.com
- The rest of the Details and Terms and Conditions remains the same as mentioned in the earlier advertisement.

SD/-
(DR. NEIKHRIELIE KHIMIAO)
Principal Director
Directorate of Health & Family Welfare
Nagaland, Kohima.

Issued by DIPR



TIR YIMYIM

YIMOBILEM (EDITORIAL)

DIMAPUR SANGTENNÜ, LUROI(AUGUST) 03, 2021

Koba government-i yimsü asür ?

2015 küm August 3 nü India government o NSCN-IM telok na tsüngda Naga yimten tebilemtsü tatem kuma latettsü asoshi tajemdakdak ken o "Framework Agreement" ka renema ayu saka idakji ajemdaker tanü tashi taoba küm pongo tsüngda kecha telatetba ken o kati maruteti lir. Ibayongji, India government dang mepelaba sayua yasüng August 2 ayaterem mapang nungi tanü anüngdang anjungmeshi tashi Naga lima kecha nunga dokan lapoka shishilemba masütsü asoshi NSCN-IM teloki sangdongogo. Ajisüaka, ano külen tesem kar nungbo Naga National Political Groups (NPPGs) teloki August 3 nü ya akhi ama dokan lapoktsü tim, aji mesüra dokan kibur dangi khuret arutsü ta metetdaksüba jagi dokan kiburtem asoshi dang masü saka Naga nunger ajak asoshi ano tebilemtsü tasen ka tenzüker asütsü. Atangji, nübertemi election agia shimtetba government-jibo state government lir, anungji state government-ia Naga nunger yimten nüchiso bushir telok kati shishilembadak shibangang ta aser kati teshibang ta ashiba tebilemtsü onük nungji kechi ashir ta asübaji kanga tongtibang asütsü. Aji oda, Naga nunger government aika asünungji, nübertem asoshia koba government-i ashiba angatsü ta asüba terata tensa tiaji Naga nunger ajak asoshi shisabolu khuret tuluka kümogo. Atangji, India kübok akümba Nagaland government nungbo opposition mali, yimsüsür ajak ka dang kümogo, anungji Nagaland nung opposition-bo mali saka government-ang aika lir. Aji oda, Naga nunger asoshibo government aika aliba dang nungibo opposition-ang aika aliba tajungba süla. Alima nung koba government südir süaka nübertem asoshi nübertem saru agi alir, anungji Nagaland nunga government ajunga nemji nübertemi saru agütsür. Iba tensaji kodang süoki ia bilemdangdir, alima tilaka nung government paikaya yur yimjung nung litetba ya tesüngmangtsüka lir. Iba jagi khen khenbo government o government na tangatetep nung sarua sarur aser senponga külem asü tasa bilemer. Atangji, tangbo nübertemi ashiba angaa Naga nunger tsüngda mekhateper aser India dena telok ajak yimjung nung lir. Ajisüaka, tanü Naga lima ajunga nung NSCN-IM teloki shishilembadak shibangtsü sangdongba aser aji anema ano NPPGs teloki nokdakba aser Nagaland government ola madokba tensa tia yagi asenok tanü amai tesünep aser yimjung nung talangkabo moutettsü amai sayur. Iba tensa tia yagi asenok ajak dang Naga yimten tebilemtsü ya joko menua meyui tekaratiba nung tembangtsüla ta angatetdaksüner. Atangji, asenoka India senso kümer election nung toktepli, Naga nunger yimten nüchiso indang jembili; asenok India nunger kümer India sepaitemi nüka lia Naga yimten nüchi indang sashisashia jembia sayuli ta kobapiga otettsü ? India asoshibo tang amai Naga nunger ajak India senso kümdaktsür, Naga nunger telok ajak den yimjung ser aliba ya Naga yimten tebilemtsü tatem kuma latetba amai bilema alitsüa akok. Iba ama tensa mapang ka nung asenoki metettsüba, joko India den Ceasefire yangluba sülen asortem arishi küm 24 jungogo. Item lanurtemibo Naga lima ya dang masü saka alima ajunga ya parnok lima ama bilemer aser yamaji maparen tapu balala nung alima ajaklen shilem agia inyaker. Aji oda, item lanurtem yagi koba government nung adentsü aser koba government ashi angatsü ta asübaji kanga tongtibang kümogo. Item lanurtemi oppositionbo mali ser government aika asüba lima nung ajemajema melitettsü, anungji memenui government ajak anema parnoki nokdaktsüa akok. Item tarutsü tensa tia tamajungtemji tang asenok bangjemer menokdangra, asen lima nung mi adoktsü, asenok o asenok na tsüngda akhi ama azütokshiteptsü. Asenok asoshi government ka nung lenir akümbaji tongtibang masü mesüra telok ka nung tanishir asübajia tongtibang masü saka asenok kin ka, anungji temulungjang ka aser tangatetba ka nung, Naga nunger ajak putepa alitsüba tang tongtibangtiba lir. Ochi o kaji, Naga nungertem ya külen India aser külen Myanmar den yimten nung mepilatettsüa kümogo, anungji Naga nungerji Naga nunger ka ama parnok den putepa lia aotsüba tang tongtibang asütsü. Joko, asenoka government ka kübok temzüng ozüng sülen shitak anidaka asen dak aketba sempet amshia nübertem nem nungdak agütsütettsüa inyakba senso ka asütsüa, government kobaiang yimsü asütsüla, aji yakta bentettsüla.

OLEMSABANG

OJANG ANA MEYOKTEPBA AGI AKÜMBA OLONG

- T. Meren Paul, Kohima


(Yashi adok nungi...)

51. Azük-tsüin - tantsür tampur, temulungjang tashidak aketer azük talangi tura mangmangra aiter aser azük tsübudaktsübuba dang azüktsüin-er ta ajar, scary of height in old age due to blood pressure problem.
52. Azü-lama - ayong azü tarok ana tetsüngda nung tzü teladak aser tesadem teperem tashi nung ayong ajanga süitettsüa tzü tanük ayimdak tesadem tesem dang azülama ta ajar. Strip of shallow water in the river between two deep poolthe gentle safe for crossing the river.
53. Azü-lang - azü (thatch) tsüzüker telang tilala alentepba dang azülang ta ajar, heap of dressed thatch.
54. Azü-lang - ayong tzü tarok teküpoklen teladak tesem, shallow river bed just below a deep pool.
55. Azü-lem - chi, aon temokong kumer aliba mi nung lemshiba, warming up cold food.
56. Azü-lepok - asü-er moyotsüngba-er kilem ajanga aodang kija masü sakaazü tanela-i meintsü asoshi tasü-er atema azü ka lepoktsüba, killing a dog that the dog's spirit escort the death person's spirit in its journey to the eternal abode.
57. Azü-lepok - alushi karh tarah, temenen tesashi aliba lu, alu kibur kibong nung thia tanoer karh taküm agiadoktsü anungji alu achidang nisung taküm melen ibai agiang ta atakadema azü bener oa lepoktsür, iba dangji azülepok ta ajar, offering dog as substitute of human to the deity.
58. Azü-mejep - kilem nung azü adongtsü atema süngkum ayasaer yangji azü jungjunga melemmelema lemer alenteper aser kilem nungji alenloker, iba dangji azümejep ta ajar, stack of thatch for roofing.
59. Azü-medonga - tzü menok mamatzü tesa dang azümedonga ta ajar, sign of pure milk.
60. Azü-meso - azüa arutsü, azüloksü tenzüker, let hugging.
61. Azü-mong - azü teyialongsa aika meya aliba tesem, azü tanü, clump of thatch.
62. Azü-ng -kisü jensüdang tongshi tongnü ali nung azüngba. Planting of post and pillar while constructing house.
63. Azü-ng - ali telong nung aliba Anong tetsü, metsü mapang nung aponger, kind of wasp.
64. Azü-ng -temulung züngzünger, amatari mali, strong, sharp memory.
65. Azü-nga - yakta, karaa, ilunga, quick, fast, prompt.
66. Azü- nga - kecha menyaki kazüa aliba, leisurely, unoccupied.
67. Azüng-ashe - keja tesemdanger mali, purmedemer mali rongjenba, lonesome.
68. Azüng-ayong - tesemdanger mali kija süaka jangratema litetba, contended loner.
69. Azüng-azünger - longsolongben mali, nisung eshikatang, deserted, desolate.
70. Azüng-dak - tongshi azüngdak, tamentakdak, foundation of structure, base.
71. Azüng-dang - alu ali aürtsü benteta lateta aür lung azüngba, demarcation of boundary.
72. Azüng-kenshi - azüngken tzü nung metaer shidaktsüba, fermented soya.
73. Azüng-kenye- azüngkenshi yangluba azüngken, alizüngken ta kah ajar, soya bean.
74. Azüng-lak - yimdak nungi lenmang talangka pilar yimer lushi tatembang, distant frontier.
75. Azüng-len - arem min tahlang nung oagi, nisung kangabo mesenzüba tesem, wilderness
76. Azüng-lenmang - yim nungi alushi tahlang azüngleni aoba lenmang, way to the far away field.
77. Azüng-lok -ki tashi aittsüasoshi tongshi tongnü talila enoksemba, additional support pillar.
78. Azüng-set -anasa nisung shinga mali kija kanga sa rongjenba, dead lonely.
79. Azüng-sep - sung, lung azüng, aür azüngdangba mapa ademba, completed planting pillar.
80. Azüng-tep - telok mesüra kejai telemtetba agiba nangzüktepba, anogo mapang adakzüktepba, azüngashitepba, making commitment, solemn swearing.
81. Azüng-tet - tongshi, tongnü mesüra aürlung, tamentakdak shidak nung mesotetba, enoktetba dang azüngtet ta ajatsü, properly erecting post, boundary pillar etc,
82. Azüng-tsü - school azüngtsü, kaket azüngtsü, to read, to study.
83. Azüng-tsü - mepet tzüsü temekong akümba agi tzü telong adenba, azüngtzü, dew
84. Azük-ozü - süngdong süngkolak nung aliba ozütem, ali nung alua mekazür, bird that live above the ground in the trees.
85. Azü-nükden - azü tenük ama tera medonga adenba, moiying angur ta jembir, dog's slanting eye.
86. Azü-pang - kümeta ayuba, tangar nem medangshidaktsui kümetba, entwined about.
87. Azü-pang - sü abena aliba küboki azüok, teka agi apanglok, to protect, embrace
88. Azü-pela - azü pelateba asaktepdang tashi agi anguba ama, tepela mazü, injurious treat.
89. Azüpen-shi - pongalashi dang azüpenshi ta kah ajar, tapioca.
90. Azü-pong - azü (thatch) telang aika tepong tulu ka kuma alentepba, big bundle of thatch.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Ita 14 sülen Gaither Vocal Band-i tan ita nungi tour tenzüksü



Alexandria, August 02 (Agencies): Alima nung coronavirus wara aliba agi nungtugu osangtajung kentener Bill Gaither aser par telok Gaither Vocal Band-i ita 14 tashi kenten sentong kecha magii aruba sülen tang mezüing August 20, 2021 aonung parnoki Paducah Heartland Arogo nung kenten sentong ayongzüka agitsü.

The Gaither Vocal Band den külemi Ladye Love Smith, Gene McDonald aser Kevin Williams nungeria shilem agitsü.

Iba kenten sentong dak sendakba osang tejangja www.gaither.com mesüra www.premierproductions.com nung angutsü.

Kenten sentong nungji Gaither Vocal Band-i akhidang parnoki tena aruba osangtajung ken aika atenba den külemi ken tasen-a aika atentsü.

Nungtugu recording artist aser ken mejemer/zülur, Bill Gaither-i tesüiba küm 70 dak tema alima tesem ajungalen ken ajanga Khrista osangtajung lemsatepa aruba dang masü saka osangtajung kentenerkem aser ken meimertem aika longjemdaksüogo.

Wara aliba agi arrshi küm 85, Bill Gaither-i tesüiba ita 14 tashi kenten sentongtem magii anisüngzüka liasü, aser tang asentenshir ano kenten sentong aika ayongzüka agitsü.

Gaither Vocal Band tentensang, Bill Gaither-i, "Ni kobika arrshia lidir liaka ni iba tesem meimtsü, aser maongka ngua longjemtetba iba telok nung züngsemtem teti meimtsü, ta ni tesüiba küm aika jembia arur. Kenjang ajanga nisungtem

melungjang nung kongshiba ngua tepela anguba dak alia tanga kecha mali. Tang ama tambur mapang nunga ni iba maongka maneni anguba atema pelar," ta metetdaksü.

2021 Celebration Tour mapang yimti 40 nung par teloki kentena senzütsü.

Productions co-owner, Gary Gentry-i, "Bill Gaither-i kentenba sabang meimer aser osangtajung lemsateptsü jangrar. Bill-i Gaither Vocal Band, Paducah area-i anir arutsü aliba atema onok pelar," ta metetdaksü.

Taküm küm tetenzüklen Gaither Vocal Band-i kensep tasenba- "That's Gospel,

Brother," sayaa liasü. Iba kensep ya country aser gospel kentener aser studio musician Gordon Mote-i produce süa liasü.

'ASCAP's Songwriters of the Century' ta narokum aliba Bill aser Gloria Gaither nati osangtajung ken 700 dak tema zülua mejemogo aser item kentem rongnung "He Touched Me," "Because He Lives" aser "There's Just Something About That Name" kentem densema lir.

1992 küm nungi tenzüka Bill Gaither-i Homecoming series aika record süa arudar aser item DVDs aser CDs million 100 dak tema yokogo.

Delhi nung Tenla ki ka bendoktsüba sülen tai tongloktsüteper

New Delhi, August 02 (Agencies): Tawa South Delhi kübok Chhatarpur nung sorkar ketdangsertemi Tenla ki ka bendoktsüba sülen yimtenren tsütsü mangatettep adokogo.

Tawa Goa semdangba mapang nung Delhi Chief Minister, Arvind Kejriwal-i, Tenla kiji Delhi Development Authority tetuyuba nung bendoktsü ta ni osang angazükogo, aser Delhi Development Authority ya Delhi sorkar kübok masü saka Centre sorkar kübok lir, ta metetdaksü.

Ajisüaka DDA-ibo Tenla ki bendoktsüba nungji parnoki shilem agia mali, ta metetdaksü.

Delhi semdangba mapang nung Kerala Chief Minister, Pinarayi Vijayan-ia, ketdangsertemi Tenla ki bendoktsüba osangji taoksatsü osang ka lir, ta metetdaksü.

Delhi nung Chhatarpur kübok Dr Ambedkar Colony nung aliba Little Flower Syro Malabar Arogo Tenla ki tawa ketdangsertemi bendokja liasü.

Panjim Convention Centre nung jembidang Delhi CM, Kejriwal-i, "Tenla kiji DDA-i bendoktsü ta kü nem metetdakja liasü. DDA ya Centre sorkar kübok lir. DDA ya Delhi sorkar kübok masü. Iba Arogo nung ozü local MLA tema densema lir. Chhatarpur nungi ozü MLA, Tanwar-a iba Arogo nung densema lir. Arogoi nungdakba teyari ajak onoki agütsütsü," ta metetdaksü.

Delhi semdangba mapang Kerala Chief Minister, Pinarayi Vijayan-ia, "Tenla kitem ya tekülem kitem lir, anungji item ama tesem nung tensa meraksatsütsüla. Kerala sorkari iba onük nung tiyongtsüi maittsü, ajisüaka sorkari akokba tashi yaritsü," ta

ANO GO ABEN TSÜNGREM DEN

Tsüngremi Ajongli Bushir Yeremia

O Israel kidong, iba poteper amai ni ne den inyaksü makok no? ta Kibubai ashir. Ajiang, poteper ket nung ajongli ama, yamaji nenok kü ket nung lir. Yeremia 18:6

Ner kibong dangi, ne tembar dangi, ner telok dangi aser nenok lima dangi tekümtet bener arutsü Tsüngremi metetta lir. Aji oda shirnoki Pai amshidaktsütsü mulunga pei taküm yanglushitsü mulunga pei taküm yanglushitsü mulunga alir parnokji Pai bushir. Ajongliji pa sasa pa atema kecha sentong mali, tenzüksü kecha tejangraba mali mesüra tagütsüba mapa inyaksü kecha nungnanga mali. Ibai ajongli ka dang. Yanglushitsü akokba, amshitetsüba ka dang, master nem bendanga agütsüba oset ka dang lir.

Mapang nung asenoki mulungsoa ashir: "Ni kü tashi, sempet metetogo aser tang ni tajungtiba nung na koda tenzüksü!" Mapang kar nung asenok Pa nem osang agütsür, "Ni kü tashi maittem metetta lir, anungji ni Na asoshi mapa inyaksü makok." Aji saka ibaji ajongli jaklaji masü. Asen tashi den mapa inyaksü asoshi Tsüngremi asen tashi kecha latetta meyutsü (2 Kor. 12:9-10).

Pai aginüba ama Pai asenok yanglutsü akok. Kodang Tsüngremi nungloktsüba mapa nung ajemaluba nungdaker, Pai ajemaluba tenzüker bushir. Kodang Pa mapa nung tejangraba tashi Pai Pa Tanela agi süngtsütsü tejangraba tenzüker bushir. Tsüngremi temeshi marok amshiner, anungji shirnoki pei dak aliba memerükba merüktetdaksütsü mulunga alir Pai item nüburi amshir. Ajongli dang alitsüji tamaren mapa ka masü. Meyushitsü asoshi takoksang Tsüngremi bushiba dak alaka iba nung tebur ajungba aser tepuatsü kecha maket.

Tebu dang Pa asoshi nai kechi inyaksü akok aser kechi inyaksü makok ta Tebu dang ashitsü ne tebilemba lira, Pai bilemba au ta agizükang aser Pai na koma yangluner yanglutsü Pa dang melaang. Ajongli ama. Po ateper na, ni ajongli. Ni bendanga agüja atar ta shiang.

metetdaksü.

DDA ketdangsertemibo Tenla ki bendoktsüba nungji parnoki shilem agia mali mesüra Tenla ki bendoktsü atema parnoki tetuyuba magütsü, ta metetdaksü.

Ali atsünga agirtem nem Block Development Officer-i July 7 nü show cause notice agüja liasü, aser iba ya Delhi sorkar revenue department kübok lir, ta DDA-i metetdaksü.

July ita tanabuba hopta nung Delhi nung Little Flower Arogo Tenla ki bendoktsüba dak sendakba nung osangbenertem den jembidang Faridabad Arogo nung Public Relations Officer, putir Ginto K. Tom-i, "Tesüiba küm 13 tashi onoki iba Arogo ya ketdangsia liasü, aser onoki timtem kecha majurui aruogo, ajisüaka tawa Delhi Development Authority-i, iba Tenla ki ya ozüing alema asü ta

tai tongloktsü. Onoki teyari bushitsü aser maneni telemtetba agia inyaksü," ta metetdakja liasü.

"Ketdangsertemi jelia osang kecha memetetdaksüi iba Tenla ki bendoktsüba ajanga onok aoksar aser jashir. Parnok anepdang aruba sülen ozü staff tem dang Tenla ki azüingtetjang ta ashi, iba sülen parnoki Tenla ki ajak bendoktsü. Sorkari iba amai inyakba atema onoki kanga sasar. Mangatettep kar ali nunga ibaji ozüing ajanga dang bentettsüla," ta paisa metetdakja liasü.

Global Council of Indian Christians (GCIC) Tir, Sajan K. George-i, "Iba mangatettep ken o ya court nung benoka lir aser tang tashi ken o mangadang, ajisüaka Delhi Development Authority-i Delhi nung aliba Syrian Malabar Arogo Tenla ki bendoktsüogo," ta aitsüogo.

OLONG PAITEP # 5894

1		2		3		4	5			
				6						7
		8								
9				10		11				
			12					13		
						14				
16						17				

TIPILEN		LANGTSÜNGLEN	
1. Nisung jenti	- (5)	1. Tenük telong	- (9)
4. Tsük rudenba	- (5)	2. Committee dang ajar	- (5)
6. Temzüng tesashi	- (5)	3. Yagi ki okdoker	- (7)
8. S_ _ _ i	- (3)	5. Yim lenmang	- (5)
9. Nisung rongnung telemsa	- (3)	7. Temoatsü keter meyipa aruba	- (9)
10. Anogoshi	- (4)	11. Kanga junga menemba	- (7)
12. Ajanga aor	- (4)	12. Kenyongi majinü	- (5)
13. Tsük rizüngdak	- (3)	13. Rong kanga tulu	- (5)
14. Tebang nungi adokba	- (3)		
16. Süngdong tatembangtiba	- (5)		
17. Meputep	- (5)		

OLONG PAITEP # 5893 TELANGZÜBA

TIPILEN :	LANGTSÜNGLEN :
1. Tanga, 6. Wara, 7. Rajang,	2. Anga, 3. Yabang, 4. Tarok, 5. Orak,
9. Anük, 10. Jenjang, 11. Alar,	8. Ainer, 9. Anema, 10. Jabili,
14. Ngashi, 15. Nala, 16. Mechi.	11. Among, 12. Miim, 13. Anem.



TABENSA KINUNGTSÜ TAKÜM

Kinungbo : Hai, tanübo na ya kechi nungsa jajadener aka? Oda ni kidang kibong nung achi ajemtsü ajak peria toktsür, aji agi tenük masüng aser mepelai jajadener asü?

Kinungtsü : Ayaa, oda nai bilemba amaji masüako, oda asen kibong nung nai achi ajemtsü peria bendena toktsüaka, aser asenok kecha shisabulu makai liaka, temeimtsü oda nai khen jung junga bilemdangangjo, asen kidanger tu kibong nung achi ajemtsü kechabo aka masü nung ano temeimtsüka shirangba tu kecha tajungba makümer aser kanga mejungi shiranga lir. Anungji oda ana tenüng nung ni tang par dangi chiyongtsü kar bener otsüti ta ser odanger arurba ati.

Kinungbo : Hi odang tokjang, shirangerji yakta jungatoktsü nung koda? Nibo tanepa nungdak kati apusoti nu. Oda taonung dang ni kidangi shilangdang kidang sorjok züb ta dang temer liangma nu.

Kinungtsü : Ayama oda nai dang mangateter ashi jungaka mejungaka asen mapang ajak nung asen temeket kiyonger kidanger den dang ajak nung lemsatepa yaritepa alitsü nung koda? Oda tangar den yaritepa lemsatepa alitsüji nai khen agi bilema maruru na? Oda pei kibong saseb atema dang bilema aliba agibo alima ya tebur majungtsü ama nibo bilemer adi, aser naia kanga dang junga bilemdang nungbo ajisa tajungtiba asütsü masü nu?

Lilir : Mr. S. Repa Pongener, Mon Bosti, Assam

AO OSHI ANGAZÜKDAK:

TANÜ ANGAZÜKTSÜBA OJANG



Kirep

(n) Tanurtem kibong kümer külena tsüraburtem den külemi aliba (joint family)

* Aor sobaliba nungbo **kirep** alitsü majungshir.

Kiren

(n) ki taren taren oa yangluba, ki tarensen (row of houses)

* Yimtak **kiren** agi yimdong topur jungdaksür.

NAI-A YA METETTER MA?

INDIA NUNG APU (BRIGDE) TALANG KAR:

1. Dhola Sadiya Bridge	9.15 Km
2. Dibang River Bridge	6.2 Km
3. Mahatma Gandhi Setu	5.75 Km
4. Bandra-Worli Sea Link (BWSL)	5.57 Km
5. Bogibeel Bridge	4.94 Km
6. Vikramshila Setu	4.70 Km
7. Vembanad Rail Bridge	4.62 Km
8. Digha-Sonpur Bridge	4.55 Km
9. Arrah-Chhapra Bridge	4.35 Km
10. Godavari Bridge	4.13 Km
11. Munger Ganga Bridge	3.75 Km
12. Chahlari Ghat Bridge	3.25 Km
13. Jawahar Setu	3.06 Km
14. Nehru Setu	3.05 Km
15. Koila Bhomora Setu	3.01 Km

TANÜBO NAI LANGZÜANG

Q. Koba State nung Pink Protection Project tenzük?

A. Kerala B. Karnataka C. Andhra Pradesh D. Tamil Nadu

(Taruba adok nung onoki langzüksü)

YASHI ADOK TELANGZÜBA : 1213 AD

SUDOKU # 5934

TELANGZUBA # 5933

	3		7		1	2	5	6		1	6	2	3	5	4	9	8	7
		6			5			8		8	4	3	2	9	7	5	1	6
		1		3	6	7		4		5	7	9	1	8	6	3	4	2
	7	5	4				3			6	3	5	9	4	8	7	2	1
				1		6				7	9	1	6	2	3	8	5	4
			2	7	9	1				4	2	8	5	7	1	6	9	3
9	2			5			7			9	1	7	4	3	5	2	6	8
		7			2		6			3	5	4	8	6	2	1	7	9
	8	4								2	8	6	7	1	9	4	3	5

OJANG LUTEP # 5479

ENASI	:	<input type="text"/>
OSHCHIIA	:	<input type="text"/>
ERAS	:	<input type="text"/>
UNGSMULOA	:	<input type="text"/>
NLTEA	:	<input type="text"/>
SÜRAGÜTA	:	<input type="text"/>
NGREMTSÜI	:	<input type="text"/>
TSTEMOAÜ	:	<input type="text"/>
NMALENG	:	<input type="text"/>
KTSÜLAPOR	:	<input type="text"/>

OJANG LUTEP TELANGZÜBA # 5478

PEI SASA CHUBA MENDEN NUNG MENRA
MAPANG TALANGKA ATATETA MALIR

TAN HOPTA ATEMA - KOMA SÜLA ?

Q. Mizoram aser Assam arrtsülen atalokba ama Nagaland aser Assam Police na ta arrtsü raktepa khatap nunga koma süla?



New Delhi, August 02, 2021: Visakhapatnam Steel Plant nija nem agütsüba anema Hombarnü New Delhi nung Jantar Mantar anasa steel plant nung inyakertemi sorkar aija longkak aitba noksa nung angur.

Bihar CM, Nitish Kumar-ia Pegasus ken o bushisüngdangtsü akhanger

Patna/New Delhi, August 02 (Agencies): Opposition party temi Pegasus mangatettep ken o bushisüngdangtsü akhangba pusema Hombarnü Bihar Chief Minister aser JD(U) lenir, Nitish Kumar-ia iba ken o bushisüngdangtsüla, ta takhangba agütsüogo.

JD(U) ya BJP-i aniba NDA teloktep sorkar nung densema lir, ajisüaka Kumar-ia iba ken o ya bushisüngdangtsü nüngdak, ta metetdaksü.

Bihar yimtiba, Patna nung osangbenertemi asüngdangba langzüdag Nitish Kumar-i, "Atangji iba ken o ya bushisüngdangtsüla," ta langzü.

JD(U) leniri, "Atangji iba onük nung o lemteptsüla aser bushisüngdangtsüla. Iba osang ya nübur nem metetdaksütsüla," ta ashi.

Kumar-i, "Phone ajanga itdangitba mangatettep ken o ya anogo aika jembia arudar. Iba onük ya Parliament nung süokogo aser osangkakettem nunga adoker. Anungji iba onük nung o lemteptsüla aser bushisüngdangtsüla. Iba dak

sendakba osang tejangja nübur nem yimjak nung metetdaksütsüla," ta ashi.

NDA teloktep nung densema aliba party tem rongnung tang mezüng JD(U)-i Opposition-i Pegasus spyware ken o bushisüngdangtsü akhangba pusemer.

Alima tesem balala nung media house 17-i, Israel nunger company NSO-i ayokba Pegasus spyware amshia India densema linük balala nung meimchir temeden atema inyakertem, osangbenertem, lawyers aser tongtibang nisungtem noklang aika phone ajanga itdangitogo, ta osang prokba sülen India nunga opposition party temi Parliament nung iba onük benoka o lemteptsü aser iba ken o bushisüngdangtsü akhanger.

Ano külen tanga osang ka nung, Pegasus ken o atema o lemteptsü asoshi Congress lenir, Rahul Gandhi-i Mongolbarnü opposition party balala nungi lenirtem senden ka ayongzükogo. Pegasus ken o nung opposition party tem ka küma

longjemer obang ka asütsü nükjidong nung Rahul Gandhi-i Constitution Club nung iba sendenji ayongzük.

Iba senden nung adentsü atema party balala nungi opposition MP tem jaokogo.

Opposition party temi iba ken o ya Parliament nung benoka o lemteptsü atema akhanger, saka sorkari iba ya tongtibang onük ka masü, ta shia opposition-i akhangba magizüker.

Rahul Gandhi-i ayongzükba senden balala nung Trinamool Congress-i medeni arudar, ajisüaka Mongolbarnü ayongzükba senden nung adentsü atema parnok nema tejaokba shidi agütsüogo.

Iba ken o bushisüngdangtsü atema takhangba agüja Supreme Court nung temepishiba ken o asem benoka lir, aser item temepishiba ken o August 5 nü angadangtsü.

Temepishiba ken o asem agütsürtemji senior journalists N Ram aser Shashi Kumar na, advocate M L Sharma aser CPI(M) Rajya Sabha MP John Brittas nunger lir.

August nungi September ita tashi tzünglu junga arutsü: IMD

New Delhi, August 02 (Agencies): India linük tesem ajaklen tzüngluruwa mongpu tanabuba shilem (August nungi September ita tashi) nung tzünglu junga arutsü, ta Hombarnü Indian Meteorological department (IMD)-i metetdaksü.

August ita nung tzünglu 'normal' arutsü- Long Period

Average (LPA) shilem 94-106% arutsü, ta IMD Director General, Mrutyunjay Mahapatra-i metetdaksü.

Hombarnü Video conferencing ajanga osangbenertem den jembidang Mahapatra-i, 1961 küm nungi 2010 küm tashi August nungi Septemper tsüngda küm shia linük nung tzünglu 428.3 mm

arua liasü aser taküm August nungi September ita tashi nung tzünglu LPA shilem 95 nungi 105 arutsü imlar, ta ashi.

Taküm July ita nung India kübok station 567 nung tzünglu kanga (115.6 nungi 204.5 mm) arua liasü aser station 112 nung tzünglu kanga sashia (204.5 mm dak tema) arua liasü.



Jalandhar, August 02, 2021: Punjab nung school tem tanaben lapokba sülen Jalandhar nung aliba sorkar school ka nung tanurtem pila mener class nung adenba noksa nung angur.

PELABA LEMSATEPER



TASOBA:
23/07/1951

TASÜBA:
26/07/2021

Ozü tsürapur tajung asür **Aochuba Ao** (Ungma) kinungertemi pa shiranga aliba mapang aser pa 26th July, 2021 anogo nung iba lima nungi pilar onok timtem aser mangyim jashi nung alidang, kija - kibong, arogo, lokti, tembar- medemertertem aser temeimertertem shironokisa sarasadem, nübo aser rongsen agi nungita yariogo, nenok ajak dang onoki kanga pelaba metetdaksür.

Nenok temeim mapa yari onoki kecha meyipa magütsütetka, teyanglur Tsüngremi nenok ajak talubosa moajangma.

- Temeim Kinungtsü, Chirnur, Semchir, Anükapang aser Kinungertem.

Pelaba Lemsateper



1934-2021

Onoki teti meima aliba tsürapur asür **O. Tsükjemnukshi Imsong** (Ungma), 27th July 2021 anogo nung iba akümüli tembangba mapang shironokisa nübu, rongsen aser sarasadem ajanga onok den mangyim jashi lemsatepogo, nenok ajak dang pelaba lemsateper.

Tsüngremi nenok kija, kibong aser lokti ajak moajangma.

Temeim kinungtsü, chirnur aser kinungertem

Mulungnen O

9/3/1928 - 12/7/2021

Ni rara tajungji raraogo Ni alizüng tonga asemogo Ni tamangji yuogo. 2 Temoti 4:7

Onoki teti meima aliba Ojala **Impeneila Longchar** (Waromung) oja nai onok toksür kodanga meshilangba limai ogo. Oja na taremkzük, temeim aketba jakla yimya den Tsüngremi temeim O jagi onok taküm len anitsü aser onoki kodanga mamatoktsü. Ojala taküm alidang nungi tasünü tashi kija, kibong, lokti balalai sarasadem, nübo, rongsen agi yariogo, nenok ajak dang kangasa pelar. Tsüngremi nenok temeim mapa tajung moajang ta ozü sarasadem.

~ Temeim Chirnur aser Semchirtem.



Office of the All Nagaland Taxi Association

Mokokchung
H.Q. Kohima, REGD. NO-1251

SANGDONGER

Sumo driver Mr. Sakumere-i (NL02T1518) ANTAM nem tenüng menük bener arutsü nung temzüng nung aliba ama 31st July 2021 anogo nungi tenzüka ita asem (3 months) atema ANTA kübok driver nungi office ajanga endoka atar.

Tarutsü mashi mapang taxi nung koda massüba timtem kar danga adokra tekeratiba nung agüja aliba number nung tongteprateptsü nübur ajak dang sangdonger. (9436206616/8837247514)

Sd/-
Noklen Jamir
President

Sd/-
Imchayapang Pongen
General Secretary

Malaysian opposition MP temi PM mapa nungi anentsü akhang



Kuala Lumpur, Malaysia nung longkak aitba sentong ka agidang Malaysian opposition züngsem Anwar Ibrahim, abelen nungi pezübüba, aser Mahathir Mohamad, abelen nungi tanabuba, nungeri "Muhyiddin aser Cabinet anenang" ta zülua bener jajaba noksa nung angur. Ato Kilonser Muhyiddin Yassin menden nungi alung ta takhangba agüja Malaysian opposition lenirtemi Kuala Lumpur nung parliament tsütsüi jaja ao.

Kuala Lumpur, Luroi/August 02 (Agencies): Malaysia nung opposition MP temi Hombarnü Ato Kilonser Muhyiddin Yassin mapa nungi anentsü khanga parliament leni tetsüng agi jaja longkak aita ao. Parliament nung Covid-19 tashidak menatepa aoba nokdangtsü atema Hombarnü senden thinentsüba sülen parnoki iba jenjang agi.

Yimti nung lenmang tongtiba nokdang yuadoker asünung MP tem Parliament nungi mile ka shi pilar moapu ka nung ajuruteper aser "Muhyiddin mapa nungi atsünginang," aser "Muhyiddin tasümail," ta yimyim ayima Parliament leni ao. Parnok madenshi tsüngda Security akangshiadoker liasü aser police temi Parliament-i aiba lenmang tongtiba mokdang liasü.

"MP timba onok tsütsü lir ta sayutsü onok adenshi; Muhyiddin'er sorkar tanü chirepogo," ta opposition lenir

Itasen aser teyari junga manguba mechi Nigeria doctor tem longkak aiter

Abuja, Luroi/August 02 (Agencies):

Itasen, insurance teyari aser ki-o-jen shidak magütsütetba mechi Nigeria sorkar meyong mozüki nung doctor tem longkak ait tenzükogo, kong coronavirus wave tasembuba tenzüka lir.

Africa nung nütsüng yongsük timtiba aliba linük, Nigeria nung doctor shilem 40 shi aliba National Association of Resident Doctors (NARD) ajanga longkak aitba ya Hombarnü tenzük, koba medical staff temi aiben mapa inyakba anena aruba rongnung ibai tasenba alitsü.

"Linük tesem ajungalen longkak aitba ya anepdang 8:00 ako nung tenzük. Ibai mapang lateta mali. COVID-19 anepaluba doctor tema tatok mali," ta NARD tir

Anwar Ibrahim-i ashi. Paisa, sorkar toktsütsü atema party kari mepeshiogo. "Anungji tanü onok 107 den parnok bendenloksemera, sorkar chirepogo," ta pai ashi. Police temi parnok ki telungi aitsü temelaba magütsüba sülen Anwar-i sentepa alirtem senshidaktsü.

Malaysia nung taküm küm atema mezüngbuba taoba hopta parliament mena liasü, saka emergency benoker aliba dak sendakba nung house mashiyimi aniba atema sorkar minister ka chubai Brehostibarnü aitsüba sülen thinen. Health-Director General-i Deobarnü, taoba hopta tashidak keta alir kar potetba sülen iba ki nung tashidak menatepa aotsü ana nung lir, ta ashi.

Opposition-i Muhyiddin anema motion of no-confidence ka benokogo aser ashiba agi, Covid menatepa aotsü ana nung lir ta ashiba ya Hombarnü

Uyilawa Okhuaihesuyi-i osangbener dang ashi.

Itasen tagütsütsü tim magütsüba, lemndong timtem ajurudang teyari agütsüba aser virus agi asüba doctor tem indang kinunger nem insurance teyari agütsütsü züngzüktepba sorkar nem metsünga-reta agidaktsütsü mechi iba mera ya agir, ta pai ashi.

"Mapa inyakba mapang asüba ozü züngsem 19 nem insurance teyari agüjang ta sorkar dang onoki asüngdang," ta pai ashi.

Okhuaihesuyi-i ashiba agi, Nigeria doctor tem kabu nung hadir tajung mali, mapa dak alang sen magütsür aser sorkar meyong mozüki nung ki-o-jen teraksar.

(Maneni tapak 9 nung...)

senden thinentsütsü atema tatemtsüka. Health dak sendakba telok balalai inyakyim shidak benoka anidakra parliament inyaksangshitettsü ta shiogo.

Anogo pongu amentsü atema latetba session ya Hombarnü tembangtsü liasü aser iba ajanga sorkari wara achaayangba dak sendakba nung Muhyiddin aitsütsü asoshi MP tem atema maongka tajung ka liasü. January ita emergency benokba sülen covid agi shiranger asemsü agi timba kümogo aser iba ajanga nüburtem pa dang kanga mepelar.

Coronavirus ya China Lab nungi adok: US Republican

Washington, Luroi/August 02 (Agencies): COVID-19 tashidak wara adokdaksüba virus ya China indang research facility nungi temai adok ta kuli aika nguteta lir, ta US Republican temi Hombarnü osang ka sangdonga US itdangiter temi metongjemteti aliba tatem kati arudaktsür.

Osang ajangasa ashiba agi, US mongintem aser China nungeri yaria aser US sorkari senotsü agüja Wuhan Institute of Virology (WIV) nung nisung dak menaloktsütsü asoshi coronavirus yanglushitsü atema inyaker aser iba amala inyakyim yabo miimshia alitsü akok ta kuli peria lir.

House Foreign Affairs Committee nungi Republican telokaba, Mike McCaul-i par committee indang Republican staff indang osang ya sangdonga liasü. Alima nung nisung million 4.4 tepsetba COVID-19 tashidak wara poktetba indang party balala lungjemer bushisüngdangtsü parnoki ajungshi.

Wuhan nung aliba facility nungi coronavirus ya nisungi yanglushir temai adokdaksü, ta tai tonglokja aliba China-i magizüker, koba nung kuli mongutetaka mongin kari tamang akar. COVID-19 ya 2019 küm Wuhan nung mezüng puteta liasü. Ajidang masü iba tashidak temai adokba miimbangtsü merang ta aitsüba Beijing-i magizüker.

Mongin kari iba tashidak wara ya Wuhan Institute of Virology anasa tzü nungi adokba chiyongtsü ayokdak tesem ka nung shiruru virus ka nisung dak menaloka tenzük südi, ta temolung meleme bilemer.

"Tzü nungi adokba chiyongtsü ayokdak nungi iba tashidak ya tenzük ta jembiba khenyongi magizüksü mapang lir ta onoki amanger. Virus ya Wuhan Institute of Virology nungi temai adok ta kuli teperi nung onoki amanger aser ibai September 12, 2019 matongdang ataloka liasü," ta Republican osang ajanga ashi.

Wuhan Institute of Virology ya amenoker küm ana majungdang iba tesem nung lendong aketba jana anepaluba yimya asadanga tajungba kuma yanglushitsü atema 2019 küm July ita sen million \$1.5 meshia liasü, ta report ajanga ashi.

Virus ya nisungi yangluba masü ta scientist temi ashiba nung ai-aora kateter, ta April ita US itdangiterba agency nungi lenir kati shia liasü.

US Tir Joe Biden-i May ita US itdangiter dang virus poktetba bushisüngdangba maparen nung tali temolung agütsüshia inyaker anogo 90 tsüngta osang agüjang, ta shia liasü.

Ajisüaka tang tashi US itdangiter temi virus ya shiruru nungi adok asü, mesüra Wuhan Institute of Virology nungi adokar tatem kati maruteter, ta osang ka ajanga ashi.

Ita 6 tsüngda Afghanistan nung tensa melenshitsu: Ashraf Ghani



Kabul, Afghanistan nung Parliament indang senden khenyongi balaka amenba mapang Afghan Tir Ashraf Ghani-i jembiba noksa nung angur.

Kabul, Luroi/August 02 (Agencies): Afghanistan tir Ashraf Ghani-i, taruba ita trok tsüngda linük nung tensa melenshiba angutsü ta ashiba den yimtitem tekümzükba kübok toktsütsüji sorkar mapa tongtibangtiba lir, ta ashi. Deobarnü virtual cabinet senden ka nung jembiba mapang Ghani-i, taoba küm 20 tsüngda Taliba pur kanga tamajungba kümogo, ta ashi.

"Parnoki yimjiyimjung mesüra terenlok atema kecha

tejangraba mali. Onoki yimjung aginer saka parnoki onok bendanga agütsüdaktsüner. Tongbang nung tensa memelenshira parnoki tajangzük akaba sensaksem ka nung shilem magütsü, anungji asenok tamendakdak tejangja ka alitsüla. Iba atema linük ajunga longjemtsü nüngdaker," ta Ghani-i ashiba ANI sangdong ka ajanga metetdaksü.

Afghan sepaitemi Deobarnü Taliban nunger camp nung bomb poklokja raraba sülen

Ghani-i iba olen lemsatepa liasü. Kasa mapang nung Taliban-ia, Kandahar nung tayimtsü anendak makogo. Taliban puri manger mesangwa tsüngda tayimtsü anendak rocket asem khaloktsü aser par telok nungi otongdar kati ashiba agi, Afghan sorkar sepaitemi tayimtsü amshia parnok amakba nokdangtsü atema iba jenjang agi.

Tayimtsü anendak runway tera raksaba sülen ketdangsurtemi Kandahar nungi tayimtsü ka danga meyoki sota ayu. Tayimtsütem mapang tatsüka lir senzüdaktsü tenzük.

Taliban-isa, Helmand aser Herat indang provincial yimtiba makogo. Sorkari ashiba agi, Afghanistan National Defence and Security Forces (ANDSF)-i linük kübok tesem balala nung Taliban kiralongrartem aika tepsetogo. Herat province nung tayimtsü amshia amakba sülen Taliban pur 200 shi tepsetogo, ta ashi.

Afghanistan security force temi Ghazni, Kandahar, Farah, Jowzjan, Balkh, Samangan, Helmand, Takhar, Kunduz, Baghlan, Kabul aser Kapisa province tem nung Taliban makogo.

'Lost' atema maparentenzükogo

Mumbai, Luroi/August 02, 2021 (Agencies): Actress Yami Gautam indang taruba film nungja 'Lost' asütsü aser iba 'investigative drama' film dak sendakba maparentenzükogo. National-Award takok angur director Aniruddha Roy Chowdhury-i iba film direct asütsü. Lost film ya Kolkata aser Purulia nung tangoktsü asalentong yangludar.

"Lost" ya investigative drama film ka asütsü, koba media nung ochishiba maparentenzükogo. Indang otsü nung ajemdaker yanglutsü sentong lir. Iba film nung Yami-i crime reporter ka ama shilem agitsü.

Zee Studios ajanga senotsü tsütsü nungita, Shareen Mantri Kedia, Kishor Arora, Sam Fernandes aser Indrani Mukherjee nung iba film yanglutsü. Yami dak alaka, iba film nung Pankaj Kapur, Rahul Khanna, Neil Bhoopalam, Pia Bajpiee aser Tushar Pandey nung cast rongnung denogo.

Wokha DTCC senden menogo

Wokha, Luroi/August 02, 2021 (TYO): Hombarnü, District Tobacco Control Cell indang district level quarterly coordination committee aser district level enforcement squad, NTCP senden ayonga agiogo, ta sangdong ajanga metetdaksü.

Iba senden agiba mapang, 'Smoke free District Headquarters campaign' sangoktsütsü asoshi telok asadangshia jemi aser iba campaign dak sendakba tetuyubatem aser asalentongtem olemtepa sülen, campaign tenzükja liasü.

Iba campaign kübok school 4 aser college 1 'tobacco free educational institute' ta sangoktsüogo. Item reju rongnung Pinewood School, Government Middle School (Sector-C), Government Middle School (Sector-D), Santsuo Memorial School aser Bailey Baptist College, Wokha dena lir.

OFFICE OF THE
**CHRISTIAN STANDARD
HIGHER SECONDARY SCHOOL**
CHANGTONGYA TOWN

TENÜNGSANG AGÜTSÜR

Taküm NBSE ajanga HSLC & HSSLC tatidang agiba nung CSHSS kaketshirtem shimokisa takok tajung nguogo, nenok ajak nem tenüngsang agütsür. Talisa taoba mapangtem dang nungi takümsa result tajungba ngutetba asoshi Kaketshir aser tesayur ajak dang pelaba lemsateper.

Result yamai liasü:

HSLC

1. Kaketshir 28-i tatidang agütsü, ajaki 1 Division ngutet.
2. Top 16: Yashijungla, D/O. Late. Lemdongnukshi
3. Subject Toppers: Yashijungla (EE) & Temsusangla (SS)
4. Star Mark holders : i. English - Kaketshir 4.
ii. Math - Kaketshir 2.
iii. Science - Kaketshir 1.
iv. SS - Kaketshir 8.
v. EE - Kaketshir 7.
vi. Ao - Kaketshir 6.

HSSLC

1. Kaketshir 27-i tatidang agütsü, ajaki pass asü.
2. Distinction holders : i. English - Kaketshir 2 liasü.
ii. Pol. Science - Kaketshir 5 liasü.
iii. History - Kaketshir 3 liasü.
iv. Education - Kaketshir 1 liasü.

Sd/-
Chairman
Managing Board

OFFICE OF THE
CHANGTONGYA YIMSEN VILLAGE COUNCIL
P.O. CHANGTONGYA; DIST. MOKOKCHUNG, NAGALAND

TENÜNGSANG AGÜTSÜR

Sensosanger rongnungi Wb. N. TEMSUNUNGSANG-i pei nem nongloksüba sorkar mapa nung temulung agüja R.C. Chiten Memorial Govt. High School, Changtongya Town nung Headmaster inyaka lia SDEO, Changtongya jenjang ngutetba asoshi sensosanger ajak tenüng nung Village Council ajanga pelaba lemsateper. Tsüngremi maneni ne wadang nung temoatsü aser takok alitsü sarasademtsür.

Sd/-
Chubasowa
Chairman

TEPELA TASOBA ANOGO Wt. Imodangla Aier

"Küpu apuba kolakji sentsüwangshi korang,
aji temeshiba taküm ajanga ajanzüker."

Apijemtsü Shin 16:31.



Onok Chirnur aser semchir ajak asoshi tanüla aser ali shi taküm akhüm tulu agütsüla, ojala Wt. Imodangla Aier (Longjang) tanü August 3, 2021 anogo nung arishi küm 99 abensaba tepela den külemi Tsüngrem nem

tenüngsang tulu agütsür. Tsüngremi onok dang kanga meima la nem arishi den külemi anema aliba taküm aser temoatsü jenti agütsüogo.

Tsüngremi ojala taküm tajung ano maneni moajangma ta ozü sarasadem teyanglur Tsüngrem dangi abener.

Temeim Chirnur
& Semchirtem.

Mulungnen O

Tasoba:
08/06/1948



ASÜR C. MANGKOREPBA PONGEN

Tasüba:
26/07/2021

Onoki teti meima aliba Asür C. Mangkorepba Pongen, mapang tatsüka shiranga aser pa iba akümü nungi pila orr onok mangyim jashi nung alidang, kija, kinunger, medemer, tentet balala, Arago, kiyonger, Sangtamilla village council aser temulunger kwikati ozü dang temeim sayua nübo, tanela aser rongsen ajanga nungita yariogo, nenok ajak dang asür kinungertemi pelaba lemsateper.

- Temeim Adianutem.

KOHIMA AO OFFICERTEM TELONGJEM "Telongjem nung leniba"

TENÜNGSANG AGÜTSÜR

Nagaland Public Works Department (NPWD) nung Nagatsür rongnung mezüng Engineer in Chief jenjang tongtetba takok asoshi Wt. Er. Limanaro nem Kohima Ao Officers' Telongjem (KAOT)-i akhüm tetushi tulu nung tenüngsang agütsür aser la mapa agi onok nümadangtetter. Tamalena la ya Nagaland government mapa nung Nagatsür rongnung mezüng Chief Engineer jenjang tongtetla liasü. Lai anguba takok tulu nung onok pelateper aser lai ano tasü itshir akhümketa nübor tenzükba mapa nung tajungtiba agi inyaksü onoki tamang akar. Lai anguba takok jenjang ya lanu asensortem asoshi teti tajungshi aser tashi angudak asütsü. Tsüngremi ano maneni la nem anema aliba taküm aser arishi talang moajangma ta onoki sarasademtsür.

Sd/-
Er. Moa Aier
President, KAOT

Sd/-
Wt. Imtinenla
Secretary, KAOT

Pelaba Metetdaksür

Late Former Chief Secy./Minister N.I Jamir jabaso, Shri. Metsübo Jamir, shiba Honorable Minister Rural Development Govt. of Nagaland lir, pai Lower Mongsenbai ward nung kiyonger lenmang kanga mejungi timtema aliba 1 Km black topping agi yanglutsüba atema ozü kiyonger kanga pelaba nübor dang metetdaksür.

Tsüngremi ano maneni pa aser par kibong moajangma.

Kiyonger tenüng nung;
R. Mar Jamir,
Lower Mongsenbai Ward Mokokchung

Itasen aser teyari junga manguba...

(Tapak 8 nungi...)

State kar nungbo ita aika indang itasen aser danga teyari magütsü lir, aser union ajanga akhangba mataloktsü tashi longkak aitba manentsü, ta pai ashi.

"Nigeria nung dang onok dang aremzüktsü mepishir. Doctor aser parnok kibongtem tim atemer. Sorkari temolung magütsüba aser onok senzükja yutsüba ajanga onoki joko sentsüh memonokteter."

Nigeria nung doctor 42,000 shi lir, aser item rongnung 16,000 bo residents - medical school graduates tem specialist ama training agir.

Mozüki nung yipten aser

mozü agi anüngba aser tashidak wara balala nungi kumzükja aliba hadir peria maliba indang doctor temi mapang talangka nungi ashishitepa arur. Parnoki life insurance, itasen timba kumtsütsü aser taa tabu balala menoktsü atema akhanger.

Taoba mapanga doctor temi kasa onük nung ajemdaker mapa inyakba anena atatsü sangdonga sorkar meyong mozüki nung inyaksangshi ajak anena liasü.

April ita nunga anogo ter longkak aittsü asoshi union ajanga jazükja liasü. Iba mapang health services aser danga inyaksangshi nung tetsükdaksü ajurua liasü.

Nigeria nung nütsüng yongstik million 210 lir, aser iba linük nung 2020 küm February ita COVID-19 mezüng putetba sülen tang tashinung iba virus yagi nisung 174,315 menepogo aser nisung 2,149 süogo, Ajisüaka tesem kar nungbo iba tashidak agi meneper ya kanga agi timba alitsü südi, ta amanger, kechiaser iba tashidak tendangba kanga ajema lir.

Taoba ita Nigeria Centre for Disease Control ajanga tali tezüpaba menatepa aoba Delta variant putet, ta sangdonga linük nung wave tasembuba tenzüktsü akok ta ketdangsurtem tali saksalema lir.

India tetsür Hockey Team-i otsü tasen yanglu; Olympic Semi-final-i iogo



Tokyo Olympics tetsür hockey asaya quarter final asaya nung Australia team akokba sülen India tetsür team tangokba noksa nung angur.

Luroi/August 2, 2021

(Agencies): India tetsür hockey team-i Hombarnü otsü tasen ka yangluogo, parnoki Australia team 1-0 agi koka Olympics nung mezüngbuba semifinal tongtetogo. Quarter-final nung Australia den asayaba mapang second quarter nung Gurjit Kaur-i penalty corner ka ajanga goal ka idaktsüba sülen parnoki takok angu.

India tetsür team-i Olympics nung tang mezüngbuba knockout stages tongteta otsü tasen ka yangluogo.

Iba asaya India-i akoktsü imlaa maliasü, kechiyong world no.2 Australia team ya asayamung nung khen danga tamakok mongui asayaa liasü.

Ajisüaka India team-i temulungtetba tulu nung kanga tasü ita asaya aser tera agi Australia madak takok angu. Drag-flicker Gurjit Kaur-i asaya tenzüker minute 22buba nung India atema penalty corner ka ajanga goal ka ya idakja liasü. Asaya tepeyong

nung India team-i penalty corner ka dang nguteta liasü.

Tang tashi nung India tetsür team-i 1980 küm Moscow Olympics asayaba mapang tajungtiba asayaa lir. Iba asayamung nung team trok rongnungi parnok jenjang pezüba nung tembanga liasü. Iba küm mezüngbuba Olympics nung tetsür hockey asayaa liasü aser round-robin format nung asayar, temaba jenjang nung tembanga team ana final asaya.

Rani Rampal-i aniba team ya Semifinal nung Argentina den asayatsü.

India team Pool A nung asaya ana akokba den asem makokba sülen jenjang pezüba nung tembanga. Kasa mapang nung Australia team-i Pool B nung asaya ajak koka temaba jenjang nung tembanga. Parnok alima nung team tem rongnung Netherlands sülen tang tanabuba jenjang nung lir.

India hockey tebur team-a küm 41 sülen tang mezüngbuba semifinal tongtetogo. Parnoki Deobarnü quarter final asaya

nung Great Britain goal 3-1 agi koka liasü. India asoshi Forward Dilpreet Singh, Gurjant Singh aser Hardik Singh nungeri goal kaka idaktsü aser Britain asoshi Sam Ward-i goal ka idaktsü.

Semifinal nung Belgium kokra 1980 küm Moscow Olympics sülen India tebur team tang mezüngbuba Final asayatsü. Iba asayamung nung parnoki final nung Spain koka gold medal angu, koba tibuba aser tatembangbuba liasü.

Chhatrasal Stadium nung nisung tepsetba ken o nung Sushil aitsüogo

Luroi/August 2, 2021

(Agencies): Chhatrasal Stadium nung nisung tepsetba ken o dak sendakba nung Sushil Kumar tia tamajungba nung tamajungba kuma odar, shiba tang tepuokdak yua lir. Pa Sagar Dhankar tepsetba ken o nung aija puoka lir.

May 4 aser 5 aonung Sagar aser par medemer ana dak stadium nung kanga mejungi azük. Iba sülen airshi küm 23 tain Dhankar mozükidang asü. Iba sülen Delhi Police-i Sushil atsüker aliba bushia oa apu.

Tang Delhi Police-i nisung tepsetba ken o nung 170-page chargesheet ka benokogo, kong aija alirtem rongnung tongtibatiji

Wade lenisüba nung Australia team Bangladesh den asayatsü

Luroi/August 2, 2021

(Agencies): Wicketkeeper Matthew Wade lenisüba nung Australia team Bangladesh den Twenty20 asaya pongu asayatsü. Iba asayamung ya Dakha nung Mongolbarnü tenzüksü.

Captain Aaron Finch temekok tachichilen surgery agitsüsa kumba sülen Caribbean aser Bangladesh tour atema Australian bio-secure bubble toktsür Barbados nung par kidangi meyipaogo.

Cricket Australia-i Hombarnü ashiba agi, India nung October 17 nungi 14 tashi asayatsü aliba T20 World Cup tashi nungbo Finch taneptsü nung alitsü imlar.

Tawa West Indies den one-day internationals asayamung nung Alex Carey-i anir Australia team asaya. Parnoki iba asayamung 2-1 agi akok. West Indies den St Lucia nung asayaba ama Carey specialist batter ka ama Bangladesh dena asayatsü akok.

Wade lenisüba nung Victoria, Tasmania aser Hobart Hurricanes ta domestic team

tem asayaa aruogo.

Bangladesh den asaya pongu ya Sher-e-Bangla National Stadium, Dhaka nung Mongolbar, Bodhbar, Hokolbar, Honibar aser taruba Hombarnü asayatsü renema lir.

SQUADS

Australia: Ashton Agar, Wes Agar, Jason Behrendorff, Alex Carey, Dan Christian, Josh Hazlewood, Moises Henriques, Mitchell Marsh, Ben McDermott, Riley Meredith, Josh Philippe, Mitchell Starc, Mitchell Swepson, Ashton Turner, Andrew Tye, Matthew Wade (captain), Adam Zampa. Travel reserves: Nathan Ellils, Tanveer Sangha.

Bangladesh: Mahmudullah (captain), Soumya Sarkar, Naim Sheikh, Shakib Al Hasan, Nurul Hasan Sohan, Afif Hossain, Shamim Hossain, Shaif Uddin, Taskin Ahmed, Shoriful Islam, Nasum Ahmed, Shak Mahedi Hasan, Mustafizur Rahman, Mohammad Mithun, Taijul Islam, Musaddek Hossain Saikat, Rubel Hossain.



Kolkata nung 'Khela Hobe Diwas' lapokba sentong nung West Bengal Chief Minister Mamata Banerjee-i football ka yokba noksa nung angur.

Lille-i tang mezüngbuba Champions Trophy kokogo

Luroi/August 2, 2021

(Agencies): Deobarnü Champions Trophy final asaya nung Portugal nung midfielder Xeka-i goal ka idakja French champion Lille-i, Cup winner Paris Saint-Germain goal 1-0 agi kokogo.

Deobarnü takok ya Lille coach tasenba Jocelyn Gourvennec atema mezüngbuba takok marok asütsü, koba pai Christophe Galtier indang mapa melenzükba sülen mezüngbuba asaya nung ajangzüktetogo.

Galtier lenisüba nung Lille-i taoba küm French league akok saka pai club toktsür Nice nung

oa aden. Pai club toktsüba sülen Gourvennec-i off season nung coach mapa agizük aser pa lenisüba nung club-i mezüngbuba asaya nung iba takok marnok koktetogo.

Final nung asaya mezüngbuba shilem tembangtsü lia Xeka-i penalty area kumbang nungi ball kanga junga metsüloktsü aser goalkeeper Keylor Navas-i pai metsüba ball menokdangteti

idaktsü.

Taoba season nung Lille-i goal ka danga mechi PSG akoba den draw süogo aser Deobarnü final asaya nunga France backup goalkeeper Mike Maignan AC Milan dang yoker liaka goal ka danga machi.

French league hokolbarnü nungi tenzüksü. PSG pur Troyes den Honibarnü asayatsü aser Lille pur Deobarnü Metz den asayatsü.

BILEMDANGANG

"Takok angutsü ana nung lir ta mangatetba ajanga nisung aika tamakok angur."